



BAB 6

ANCAMAN KOMUNIS DAN PERISYTIHARAN DARURAT

Sinopsis

Perkembangan pengaruh komunis di negara kita berlaku sebelum meletusnya Perang Dunia Kedua. Komunis melakukan pelbagai tindakan untuk melumpuhkan ekonomi negara dan menggugat kestabilan politik. Matlamat komunis adalah untuk merampas kuasa daripada British dan menggantikannya dengan sebuah Republik Komunis. Namun begitu, British berjaya menawan hati dan fikiran rakyat untuk bersama-sama membanteras ancaman komunis. Zaman darurat telah membawa pelbagai kesan kepada politik, ekonomi dan sosial di negara kita.

- Perisytiharan Darurat
- Pengharaman PKM
- Pendaftaran Kebangsaan dan Kad Pengenalan

Penubuhan MCA

Pelaksanaan Rancangan Briggs

Pembunuhan Sir Henry Gurney

1948

1949

1950

1951





Inti Pati Pembelajaran

1. Latar belakang pengaruh komunis di negara kita.
2. Ancaman komunis di negara kita.
3. Usaha menangani ancaman komunis.
4. Kesan zaman darurat terhadap negara kita.



Elemen Kewarganegaraan dan Nilai Sivik

1. Kepentingan sikap berhati-hati dalam menghadapi anasir yang menggugat kestabilan negara.
2. Kepentingan mempunyai pemikiran yang strategik.
3. Kepentingan menjamin keamanan negara.
4. Kesediaan untuk berkorban demi negara.



Kemahiran Pemikiran Sejarah

1. Memahami kronologi perkembangan pengaruh komunisme di negara kita.
2. Meneroka bukti ancaman komunis di negara kita.
3. Membuat interpretasi usaha membanteras ancaman komunis di negara kita.
4. Membuat imaginasi tentang ancaman komunis di negara kita.
5. Membuat rasionalisasi Perang Saraf untuk keamanan negara.

- Pelaksanaan Perang Saraf
- Penubuhan Parti Perikatan

Perundingan Baling

Perisytiharan Penamatan Darurat

1952

1955

1960



6.1 Kemasukan Pengaruh Komunis di Negara Kita

Komunisme ialah ideologi yang diasaskan oleh Karl Marx dan Friedrich Engels. Mereka menulis karya *Communist Manifesto* dan *Das Kapital*. Perkataan komunis membawa maksud orang yang menganut fahaman komunis. Komunisme ialah suatu fahaman politik yang menjadikan ekonomi dan barang pengguna sebagai milik negara. Percubaan untuk menyebarkan ideologi komunis di negara kita bermula sejak tahun 1920-an. Pada masa itu, terdapat dua buah negara yang terlibat dalam penyebaran fahaman komunis, iaitu China dan Indonesia.

Kemasukan Pengaruh Komunis dari China

- Ideologi komunis mula dibawa masuk ke negara kita sejak awal tahun 1920-an melalui cawangan Parti Kuomintang (KMT) yang beribu pejabat di China.
- Menjelang tahun 1924, cawangan KMT ditubuhkan pada hampir setiap bandar di negeri Melayu bagi menyebarkan pengaruh komunis. Antara bandar tersebut termasuklah Muar, Melaka, Seremban, Klang, Kuala Lumpur dan Sungai Petani.
- Selain KMT, terdapat sebuah lagi pertubuhan, iaitu Main School yang bergerak dalam kalangan orang Hailam di bawah arahan Parti Komunis China (PKC). Pada tahun 1927, perpecahan berlaku antara Parti KMT dengan PKC. The Communist International (Comintern) yang berpusat di Moscow mengarahkan penubuhan Parti Komunis Nanyang (PKN) pada tahun 1928.
- Namun begitu, PKN tidak berjaya mencapai matlamatnya. Keadaan ini mendorong Comintern mengarahkan penubuhan parti baharu, iaitu Parti Komunis Malaya (PKM).

Kemasukan Pengaruh Komunis dari Indonesia

- Pada tahun 1920, beberapa orang pemimpin komunis dari Indonesia seperti Tan Malaka, Alimin, Moeso, Boedisoeljito, Hasanoesi, Winanta, Soebakat dan Sutan Perpateh menyebarkan fahaman komunis di Seberang Perai, Pulau Pinang, Perak Utara dan Kedah.
- Kegagalan Partai Komunis Indonesia (PKI) menguasai Pulau Jawa (1926) menyebabkan PKI berusaha untuk membuka cawangan di Tanah Melayu.
- Namun begitu, usaha mereka tidak mendapat sambutan daripada orang Melayu kerana komunis menggunakan kekerasan untuk mencapai matlamat mereka.



Pergerakan pengaruh komunis ke negara kita.



Bincangkan kemasukan pengaruh komunis di negara kita.



Ilustrasi Alimin dan Tan Malaka

Penubuhan Parti Komunis Malaya

- Pada 30 April 1930, Parti Komunis Malaya (PKM) ditubuhkan di Kuala Pilah, Negeri Sembilan. PKM bergerak melalui kesatuan sekerja, pertubuhan, penerbitan akhbar dan sekolah Cina.
- Seterusnya, PKM menyusup ke dalam Kesatuan Sekerja untuk mengukuhkan pengaruh komunis.

Pada zaman pendudukan Jepun (1941–1945), PKM bertindak:

- Menjalinkan kerjasama dengan British dalam usaha memerangi Jepun.
- Membentuk Malayan People's Anti-Japanese Army (MPAJA) atau Bintang Tiga pada tahun 1942.
- Menerima bantuan senjata, latihan, kewangan, bekalan logistik dan perubatan daripada pihak British.

Selepas Jepun menyerah kalah, kekosongan politik berlaku di Tanah Melayu disebabkan oleh kelewatan British kembali ke Tanah Melayu. Keadaan ini memberikan peluang kepada PKM untuk meluaskan pengaruhnya.

- Bintang Tiga PKM melalui MPAJA keluar dari hutan dan melakukan kekacauan. Mereka melakukan kekejaman dan pembunuhan terhadap orang Melayu, Cina dan India yang didakwa pernah bersuhabat dengan Jepun.
- Apabila BMA mengambil alih pentadbiran di Tanah Melayu, MPAJA dibubarkan pada 1 Disember 1945. Walau bagaimanapun, PKM dibenarkan bergerak sebagai sebuah pertubuhan yang sah di Tanah Melayu. Keadaan ini memberikan peluang kepada PKM untuk mempengaruhi beberapa pertubuhan tertentu dengan ideologi komunis.
- Seterusnya, PKM menyusup dalam kesatuan sekerja, iaitu Pan-Malayan Federation of Trade Unions (PMFTU).
- Menjelang bulan Disember 1947 hingga bulan Mei 1948, komunis berjaya menguasai 335 kesatuan sekerja dan menyusup dalam PKMM, MDU dan PUTERA-AMCJA.
- Oleh sebab pergerakan komunis mengancam ekonomi dan keselamatan negara, maka British bertindak meluluskan Trade Union Ordinance No. 9 of 1948. Ordinan ini menyekat pengaruh komunis dalam kesatuan sekerja dan akhirnya mengharamkan PKM.

Penyebaran ideologi komunis dari China dan Indonesia menyebabkan terdapat penduduk yang terpengaruh dengan fahaman komunis. Ideologi ini berkembang dalam kesatuan sekerja. Selepas Perang Dunia Kedua, berlaku kekosongan politik di Tanah Melayu yang membuka peluang kepada PKM untuk menyebarkan fahamannya. PKM kemudiannya diharamkan oleh British.

6.2 Ancaman Komunis di Negara Kita

Gerakan Komunis Antarabangsa telah menganjurkan dua persidangan di Calcutta, India. Persidangan Kongres Belia Asia berlangsung pada 19 Februari 1948 hingga 25 Februari 1948, manakala Persidangan Parti Komunis India diadakan pada bulan Mac 1948. PKM turut menghantar wakil ke persidangan tersebut.

Dalam persidangan tersebut, pengikut komunis di kawasan yang dijajah digesa supaya memperhebat perjuangan menentang kuasa imperialis di setiap negara Asia. Berikutan daripada itu, Jawatankuasa Eksekutif Pusat PKM telah mengambil keputusan untuk melancarkan

perjuangan bersenjata bagi menubuhkan Republik Komunis di Tanah Melayu. Tindakan komunis melancarkan perjuangan bersenjata menyebabkan British mengisytiharkan darurat. PKM meneruskan tindakan melumpuhkan ekonomi dan infrastruktur serta mengancam keselamatan rakyat.

Perisytiharan Darurat

Pada 16 Jun 1948, komunis membunuh tiga orang pengurus ladang Eropah di Sungai Siput, Perak. Komunis membunuh Arthur Walker, pengurus Ladang Ephil, John Allison, pengurus Ladang Phin Soon dan pembantunya Ian Cristian.

Berikutan dengan peristiwa tersebut, Sir Edward Gent, Pesuruhjaya Tinggi British di Tanah Melayu mengisytiharkan darurat. Undang-Undang Darurat dilaksanakan di kawasan tertentu di negeri Perak seperti di Ipoh dan Sungai Siput serta di Johor yang merangkumi daerah Muar, Kluang, Kulai dan Plentong.

Pada 17 Jun 1948, Undang-Undang Darurat ini diperluas meliputi keseluruhan negeri Perak dan Johor.

Seterusnya, pada 18 Jun 1948, undang-undang ini dikuatkuasakan ke seluruh Tanah Melayu. Dengan itu, usaha membanteras ancaman komunis di Persekutuan Tanah Melayu bermula dengan rasminya.




Sir Edward Gent, Pesuruhjaya Tinggi British di Tanah Melayu.

Sumber: Pusat Maklumat Utusan dan Unit Foto Utusan Melayu (M) Bhd.



Lori yang dibakar oleh komunis.

Sumber: Mohd Azzam Mohd Hanif Ghows, 2007. *The Malayan Emergency Revisited 1948-1960*. Edisi kedua. Kuala Lumpur: AMR Holding Sdn. Bhd.



Kereta api yang disabotaj oleh komunis untuk melumpuhkan ekonomi British di Tanah Melayu.

Sumber: Pusat Maklumat Utusan dan Unit Foto Utusan Melayu (M) Bhd.



Bilakah perisytiharan darurat dikuatkuasakan?

Tindakan Komunis

Walaupun Undang-Undang Darurat dikuatkuasakan di seluruh Tanah Melayu, komunis tetap meneruskan aktiviti menggugat keamanan dan kestabilan negara. Bagi memastikan kejayaan dalam perjuangannya, komunis mencetuskan huru-hara di seluruh negara agar penduduk hilang keyakinan terhadap British. Mereka melakukan pelbagai tindakan untuk melumpuhkan ekonomi, merosakkan infrastruktur, mengancam keselamatan penduduk dan pasukan keselamatan.

Komunis Melumpuhkan Ekonomi

Sejak Undang-Undang Darurat dikuatkuasakan, lombong bijih timah dan ladang getah menjadi sasaran utama serangan komunis untuk melemahkan ekonomi British. Dari tahun 1948 hingga tahun 1956, komunis menyerang 80 lombong bijih antaranya di Perak, Selangor dan Negeri Sembilan. Mereka merosakkan pokok getah, kilang estet, rumah asap, rumah kongsi, kedai dan sekolah serta membunuh pekerja. Tindakan komunis ini menyebabkan pekerja lombong dan ladang getah menderita. Selain mengganggu kerja harian di lombong dan ladang, nyawa mereka turut terancam.



Ladang getah dan rumah kediaman yang telah dibakar oleh komunis.

Sumber: Mohd Azzam Mohd Hanif Ghows, 2007. *The Malayan Emergency Revisited 1948-1960*. Edisi kedua. Kuala Lumpur: AMR Holding Sdn. Bhd.



Pokok getah yang dirosakkan oleh komunis untuk melumpuhkan ekonomi.

Komunis Merosakkan Infrastruktur

Komunis menjalankan pelbagai kegiatan sabotaj terhadap kemudahan asas, terutama sistem pengangkutan dan perhubungan. Mereka mengedam, merosakkan dan mengalihkan landasan kereta api. Kenderaan yang melalui jalan raya pula ditembak dan dibakar. Komunis turut mensabotaj kemudahan telefon dan telegraf serta merosakkan paip air. Seterusnya, mereka bertindak menyerang pekerja awam yang ditugaskan untuk membaiki jalan raya, memasang paip air, membina sistem pengairan dan pekerja yang menjalankan penyelidikan di tapak skim hidroelektrik. Keadaan ini menjejaskan kehidupan harian penduduk tempatan kerana infrastruktur tidak dapat diselenggara dengan baik.

Komunis Mengancam Keselamatan Rakyat

Komunis melakukan pelbagai tindakan ganas yang menggugat keselamatan rakyat. Mereka mengugut, mensabotaj, menyerang, melakukan kekejaman, menganiaya, menculik, merampas, membakar harta benda dan membunuh penduduk yang enggan bekerjasama. Contohnya, pada malam 5 Julai 1949, komunis mencampakkan bom tangan di Sheum Circus, Kampar, Perak. Akibatnya, seramai 46 orang cedera parah dan empat orang mati. Tindakan komunis ini menyebabkan kesengsaraan dan penderitaan kepada rakyat.

Jadual 6.1 Statistik orang awam yang terbunuh, tercedera dan hilang pada tahun 1948–1960.

Terbunuh	Tercedera	Hilang	Jumlah
2473	1385	810	4668

Sumber: Ramlah Adam, 2014. *Pahlawan Tegar Merdeka*. Kuala Lumpur: Dewan Bahasa dan Pustaka.

Komunis Mengancam Pasukan Keselamatan

Parti Komunis Malaya (PKM) menyasarkan pasukan keselamatan dan menyerang balai polis. Tindakan ini dilakukan untuk mencetuskan keadaan yang huru-hara dan menunjukkan ketidakupayaan kerajaan untuk melindungi keselamatan penduduk.

Jadual 6.2 Statistik anggota keselamatan yang terkorban dan tercedera pada tahun 1948–1960.

Pasukan	Terkorban	Tercedera	Jumlah
Polis	513	701	1214
Special Constables	593	746	1339
Auxiliary Police	242	154	396
Tentera	519	959	1478

Sumber: Ramlah Adam, 2014. *Pahlawan Tegar Merdeka*. Kuala Lumpur: Dewan Bahasa dan Pustaka.



Pembunuhan Henry Gurney



Pada 13 September 1948, Sir Henry Gurney dilantik sebagai Pesuruhjaya Tinggi British di Tanah Melayu menggantikan Sir Edward Gent. Pada 6 Oktober 1951, Sir Henry Gurney menjadi mangsa serang hendap komunis di Jalan Kuala Kubu Bharu dalam perjalanan ke Bukit Fraser.



Pasukan keselamatan sedang bertugas untuk membanteras ancaman komunis.

Sumber: Mohd Azzam Mohd Hanif Ghows, 2007. *The Malayan Emergency Revisited 1948–1960*. Edisi kedua. Kuala Lumpur: AMR Holding Sdn. Bhd.

Komunis menyerang pasukan keselamatan seperti yang berikut:

17
Jun
1948

Choh, Johor

Komunis menyerang Balai Polis Kampung Jeram.

26
Jun
1948

Temerloh, Pahang

Komunis menyerang Balai Polis Kuala Krau.

28
Jun
1948

Jerantut, Pahang

Komunis membakar balai polis.

17
Julai
1948

Gua Musang, Kelantan

Komunis menyerang Balai Polis Gua Musang.

8
Mac
1949

Kajang, Selangor

Komunis menyerang jip tentera.

22
Februari
1950

Muar, Johor

Komunis menyerang Balai Polis Bukit Kepong.

24
Mac
1950

Ulu Semur, Kelantan

Komunis menyerang hendap pasukan askar Melayu.

28
Jun
1950

Kota Tinggi, Johor

Komunis menyerang Balai Polis Kambau.

21
Februari
1952

Taiping, Perak

Komunis menyerang kenderaan polis.

28
Mei
1954

Kedah

Komunis membunuh Ketua Polis Kedah.

18
Oktober
1954

Pontian, Johor

Komunis menyerang Balai Polis Chuan Seng.



Muzium Polis Diraja Malaysia (PDRM)



Muzium Polis Diraja Malaysia terletak di Kuala Lumpur, Malaysia. Muzium Polis Diraja Malaysia dirasmikan pembukaannya pada 9 Januari 1961 oleh Yang di-Pertuan Agong ketiga, Tuanku Syed Putra ibni Almarhum Syed Hassan Jamalullail. Muzium Polis Diraja Malaysia yang baharu telah dibina pada tahun 1983. Muzium ini dibuka pada 2 Oktober 1998 dan dirasmikan pada 24 Julai 1999 oleh Tun Abdullah Ahmad Badawi.

Arahan:

1. Murid diagihkan kepada beberapa kumpulan kecil untuk membuat kajian yang berikut di galeri A, B, C dan Dataran Perwira.
 - (a) Peranan PDRM semasa zaman darurat.
 - (b) Koleksi anugerah, pingat dan pencapaian.
 - (c) Artifak yang dipamerkan.
 - (d) Senjata dan kenderaan yang digunakan.
2. Setiap kumpulan dikehendaki menyiapkan tugas yang diberikan.
3. Selepas lawatan, setiap kumpulan dikehendaki membentangkan dapatan masing-masing.

Komunis cuba mewujudkan sebuah kerajaan republik komunis di Tanah Melayu. Bagi merealisasikan matlamat mereka, pelbagai tindakan dilakukan bertujuan mengancam keamanan negara. Tindakan komunis ini menyebabkan rakyat dan kerajaan bekerjasama membanteras ancaman komunis.

6.3 Usaha Menangani Ancaman Komunis

Bagi menangani ancaman komunis, beberapa usaha telah diambil seperti penguatkuasaan Undang-Undang Darurat, pemerkasaan pasukan keselamatan, pengenalan pendaftaran kebangsaan, Rancangan Briggs, tawaran pengampunan, Kempen Bulan Rakyat Melawan Penjahat, perintah berkurung, perang saraf dan rundingan Baling.

1. Penguatkuasaan Undang-Undang Darurat

Bagi menguatkuasakan Undang-Undang Darurat, British mengambil pelbagai tindakan antaranya termasuklah seperti yang berikut:

1 Menahan sesiapa sahaja yang disyaki terlibat dalam pergerakan komunis tanpa sebarang perbicaraan.

3 Mengetatkan undang-undang senjata api dengan mengenakan hukuman mati terhadap mereka yang membawa senjata api dan bahan letupan.

5 Mengharamkan PKM dan parti politik berfahaman radikal. Antaranya termasuklah AWAS, Ikatan Pembela Tanah Air (PETA), Pemuda Radikal Melayu (PERAM), PKMM dan Hizbul Muslimin.

2 Mengenakan hukuman berat kepada sesiapa sahaja yang membantu komunis.

4 Mengegedah rumah kediaman, memagar kampung, mengadakan perintah berkurung, mewujudkan Kampung Baru dan memindahkan serta menempatkan penduduk.

6 Menangkap pemimpin gerakan radikal seperti Ahmad Boestamam, Ishak Haji Muhammad, Abu Bakar al-Baqir dan Khatijah Sidek.

PENGUATKUASAAN UNDANG-UNDANG DARURAT

2. Pemerkasaan Pasukan Keselamatan

British telah memperkasakan pasukan keselamatan tempatan untuk membanteras kegiatan komunis. British menubuhkan pasukan yang berikut:

PASUKAN KESELAMATAN

POLIS

- Cawangan Khas
- Special Constables (SC)
- Polis Hutan
- Polis Wanita
- Senoi Praaq (Urang Perang)
- Auxiliary Police (AP)

TENTERA

- Pasukan Askar Melayu
- Pasukan Askar Komanwel
- Sarawak Rangers

SUKARELAWAN

Home Guard

Cawangan Khas

- Pada bulan Ogos 1950, Guy C. Madoc dilantik mengetuai badan perisikan. Beliau menubuhkan Cawangan Khas (Special Branch) yang kemudiannya menjadi sebahagian daripada pasukan polis.
- Tugas risikan yang dilakukan oleh pasukan ini membolehkan pihak berkuasa mengetahui operasi PKM.
- Terdapat anggota pasukan yang menyamar sebagai komunis untuk mendapatkan maklumat tentang PKM.
- British juga mengambil ramai ahli Cawangan Khas dalam kalangan orang Cina untuk menjejak anggota komunis hingga kubu persembunyiannya.
- Sebagai sebuah badan perisik, Cawangan Khas ini memberikan sumbangan semasa darurat.
- Kejayaan cawangan ini membuat penyusupan dalam organisasi PKM memudahkan pasukan keselamatan merancang tindakan terhadap PKM.



Anggota Cawangan Khas sedang merancang strategi untuk memerangi komunis.

Sumber: Mohd Azzam Mohd Hanif Ghows, 2007. *The Malaysian Emergency Revisited 1948-1960*. Edisi kedua. Kuala Lumpur: AMR Holding Sdn. Bhd.

Special Constables

- Pasukan ini ditubuhkan pada tahun 1948 ketika Rancangan Briggs sedang dilaksanakan.
- Seramai 24 ribu orang Special Constables dilatih dan dihantar mengawal ladang dan kawasan lombong.
- Mereka menjadi barisan hadapan dalam menghadapi ancaman komunis.



Polis Hutan

- Pada asalnya, pasukan ini dikenali sebagai Flying Squad.
- Pada tahun 1951, pasukan ini dinamakan Jungle Squad dan kemudiannya Jungle Companies.
- Seterusnya, pada tahun 1953, pasukan ini disusun semula dan dinamakan Police Field Force (PFF).
- Pada 18 Oktober 1958, PFF dikenali sebagai Pasukan Polis Hutan.
- Antara tugas mereka termasuklah memburu komunis, membuat rondaan di pinggir hutan, membawa bekalan makanan kepada pasukan yang bertugas di dalam hutan dan menjaga kubu (jungle fort).

Anggota Special Constables melindungi pekerja di ladang teh.

Sumber: Wendy Khadijah Moore, 2004. *Malaysia: A Pictorial History 1400 - 2004*. Kuala Lumpur: Arkib Negara Malaysia dan The New Straits Times Press (Malaysia) Berhad.



Anggota Polis Wanita.

Sumber: Mohd Azzam Mohd Hanif Ghows, 2007. *The Malaysian Emergency Revisited 1948-1960*. Edisi kedua. Kuala Lumpur: AMR Holding Sdn. Bhd.

Polis Wanita

- Polis wanita ditubuhkan pada bulan Ogos 1955.
- Barbara D.R. Wentworth merupakan pegawai polis wanita yang pertama. Beliau ditugaskan melatih anggota baharu dan menyusun pasukan polis wanita.

Senoi Praaq (Urang Perang)

- Pasukan Senoi Praaq ditubuhkan pada tahun 1956.
- Senoi Praaq dalam bahasa Semai dikenali sebagai Urang Perang.
- Mereka ditugaskan mengesan tempat persembunyian komunis di dalam hutan.
- Anggotanya terdiri daripada Orang Asli suku Senoi, Semai dan Temuan.
- Mereka lebih dikenali sebagai "The Silent Killers".



Pasukan Polis Senoi Praaq sedang melakukan pemeriksaan di perkampungan Orang Asli.

Sumber: Muzium Polis Diraja Malaysia, 2004. *Sejarah Bergambar Institusi Polis di Malaysia*. Edisi kedua. Kuala Lumpur: Muzium Polis Diraja Malaysia.



Auxiliary Police

- Pada bulan Disember 1948, terdapat seramai 17 ribu orang anggota Auxiliary Police (AP) di seluruh Persekutuan Tanah Melayu.
- Mereka mempertahankan bandar dan kampung daripada serangan komunis.
- Mereka membantu polis menentang ancaman komunis.
- Pada tahun 1956, anggota AP dijadikan Police Volunteer Reserve.

Auxiliary Police.

Sumber: Mohd Azzam Mohd Hanif Ghows, 2007. *The Malaysian Emergency Revisited 1948-1960*. Edisi kedua. Kuala Lumpur: AMR Holding Sdn. Bhd.

TENTERA

Pasukan Askar Melayu

- Pasukan ini ditubuhkan pada tahun 1933.
- Tugas pasukan ini membanteras gerila komunis di dalam hutan.
- Pada masa yang sama, kerajaan melengkapkan tentera darat dengan pasukan meriam dan pasukan bantuan yang lain.
- Rejimen Askar Melayu juga diperbesar daripada tiga rejimen kepada tujuh rejimen.
- Pasukan ini mencapai prestasi cemerlang dalam usaha memerangi komunis.
- Mereka bukan sahaja berjaya menumpaskan anggota komunis, malah memusnahkan kubu operasi komunis.



Pasukan Askar Melayu.

Sumber: Mohd Azzam Mohd Hanif Ghows, 2007. *The Malaysian Emergency Revisited 1948-1960*. Edisi kedua. Kuala Lumpur: AMR Holding Sdn. Bhd.

Pasukan Askar Komanwel

- Kerajaan membawa masuk askar Komanwel antaranya dari Britain, Australia, New Zealand, India, Afrika Timur, Kenya, Uganda, Rhodesia dan Fiji.
- Pada tahun 1954, terdapat seramai 25 ribu orang askar Britain, 10 ribu askar Gurkha, satu batalion askar Afrika dan satu batalion rejimen Fiji ditempatkan di Tanah Melayu.
- Pasukan askar ini turut membantu dalam usaha memerangi komunis di negara kita.



Pasukan Askar Komanwel.

Sumber: Mohd Azzam Mohd Hanif Ghows, 2007. *The Malayan Emergency Revisited 1948-1960*. Edisi kedua. Kuala Lumpur: AMR Holding Sdn. Bhd.



Anggota Sarawak Rangers (Iban Tracker).

Sumber: Mohd Azzam Mohd Hanif Ghows, 2007. *The Malayan Emergency Revisited 1948-1960*. Edisi kedua. Kuala Lumpur: AMR Holding Sdn. Bhd.

Sarawak Rangers

- Pasukan ini terdiri daripada orang Iban.
- Tugas mereka menjejak persembunyian komunis di dalam hutan.
- Mereka mahir dalam selok-belok hutan.
- Cogan katanya, "Agi Idup Agi Ngelaban" yang bermaksud "Selagi hidup selagi melawan".
- Banyak kem dan markas komunis berjaya dimusnahkan oleh pasukan ini.



Anggota pasukan Home Guard wanita.

Sumber: Wendy Khadijah Moore, 2004. *Malaysia: A Pictorial History 1400-2004*. Kuala Lumpur: Arkib Negara Malaysia dan The New Straits Times Press (Malaysia) Berhad.

SUKARELAWAN

Home Guard

- Home Guard ialah pasukan Pengawal Kampung.
- Tugas mereka membantu menyekat pergerakan bekalan makanan dan ubatan daripada jatuh ke tangan komunis.
- Anggotanya diberikan latihan ketenteraan untuk mengawal kampung dan pekan.
- Pada bulan Julai 1951, terdapat sejumlah 79 ribu orang Home Guard di Persekutuan Tanah Melayu.
- Mereka juga berjaya membantu dalam usaha mengamankan kampung dan melindungi pekerja lombong bijih timah daripada serangan komunis.



Pesan daripada Apot a/k Saad (Big Nose), perintis Senoi Praaq, "Jangan sia-siakan pengorbanan saya serta rakan-rakan yang telah lama bersara. Dulu kami terpaksa berlari di dalam hutan, makanan dicatu, tak cukup tidur, tinggalkan anak bini berbulan-bulan, nyawa pula di hujung peluru, semuanya semata-mata nak tengok rakyat Malaysia dapat hidup aman."

3. Pendaftaran Kebangsaan dan Kad Pengenalan

Di bawah Undang-Undang Darurat, kerajaan memperkenalkan sistem pendaftaran kebangsaan dan penggunaan kad pengenalan pada 23 Julai 1948 bagi mengawal pergerakan penduduk.

Langkah ini diambil untuk memudahkannya pihak keselamatan membezakan orang awam dengan komunis. Di bawah peraturan tersebut, setiap lelaki, wanita dan kanak-kanak yang berumur 12 tahun ke atas dikehendaki mendaftarkan diri dengan pihak berkuasa. Orang awam dikehendaki membawa kad pengenalan ke mana-mana sahaja.



Kad pengenalan Persekutuan Tanah Melayu.

Sumber: Malaysia. Arkib Negara Malaysia, 2006. *Arkib Wirisan Eksklusif*, Kuala Lumpur: Utusan Publications & Distributors Sdn. Bhd.

Anggota Special Constables sedang memeriksa kad pengenalan masyarakat tempatan.

Sumber: Mohd Azzam Mohd Hanif Ghows, 2007. *The Malayan Emergency Revisited 1948-1960*. Edisi kedua. Kuala Lumpur: AMR Holding Sdn. Bhd.



Pemeriksaan kad pengenalan oleh anggota keselamatan.



Apakah tujuan kad pengenalan diperkenalkan pada tahun 1948?



Anggota Special Constables sedang memeriksa kad pengenalan penumpang bas.

Sumber: Mohd Azzam Mohd Hanif Ghows, 2007. *The Malayan Emergency Revisited 1948-1960*. Edisi kedua. Kuala Lumpur: AMR Holding Sdn. Bhd.



Kawasan penempatan Kampung Baru.

Sumber: Mohd Azzam Mohd Hanif Ghows, 2007, *The Malayan Emergency Revisited 1948-1960*. Edisi kedua. Kuala Lumpur: AMR Holding Sdn. Bhd.



Sir Harold Rowdon Briggs

Sumber: Mohd Azzam Mohd Hanif Ghows, 2007, *The Malayan Emergency Revisited 1948-1960*. Edisi kedua. Kuala Lumpur: AMR Holding Sdn. Bhd.

4. Rancangan Briggs

Rancangan Briggs dilancarkan oleh Sir Henry Gurney, Pesuruhjaya Tinggi British di Tanah Melayu pada tahun 1950. Leftenan Jeneral Sir Harold Rowdon Briggs pula dilantik menjadi Pengarah Operasi. Tujuan utama langkah ini adalah untuk memutuskan hubungan PKM dengan Min Yuen yang membekalkan makanan, senjata, maklumat dan ubat-ubatan kepada PKM. Rancangan Briggs merupakan langkah yang berkesan untuk melemahkan pergerakan komunis.

Suasana di Kampung Baru

Penduduk setingan di pinggir hutan dipaksa berpindah dari kampung halaman ke sebuah petempatan baharu yang agak asing. Kawasan penempatan semula ini digelar sebagai "Kampung Baru". Kampung Baru dilengkapi dengan kemudahan tempat tinggal, bekalan elektrik, air paip, sekolah dan kemudahan kesihatan. Selain itu, petempatan ini juga mempunyai kemudahan pusat komuniti dan rumah ibadat. Jawatankuasa kampung ditubuhkan untuk memelihara dan memperbaiki kemudahan di Kampung Baru itu. Kampung Baru juga dipagari dengan kawat berduri dan dikawal oleh Special Constables. Sehingga bulan Mac 1952, lebih daripada 423 ribu orang penduduk di pinggir hutan dipindahkan ke 410 buah Kampung Baru.



Pengagihan makanan di Kampung Baru.

Sumber: Mohd Azzam Mohd Hanif Ghows, 2007, *The Malayan Emergency Revisited 1948-1960*. Edisi kedua. Kuala Lumpur: AMR Holding Sdn. Bhd.



Meneroka bukti

Pelaksanaan Rancangan Briggs di negara kita memberikan kesan kepada penduduk tempatan. Buktikan.



Min Yuen (Organisasi Massa)

Min Yuen ditubuhkan untuk mendapatkan bekalan makanan dan wang kepada komunis. Min Yuen juga melakukan peras ugut, merompak, menjalankan kegiatan propaganda, melakukan perisikan dan sabotaj, merekrut ahli baharu serta membantu dalam menjalankan kegiatan politik. Min Yuen beroperasi pada sebelah malam dan bergerak dalam kalangan rakyat tanpa senjata api.



5. Tawaran Pengampunan

Pada 6 September 1949, Sir Henry Gurney mengisytiharkan pengampunan kepada komunis supaya menyerah diri. Setiap hari, Radio Malaya menyiarkan syarat tawaran pengampunan. Poster juga ditampal di merata-rata tempat. Sebanyak 40 juta risalah dan 12 juta pas pengampunan diedarkan dalam bahasa Cina, Melayu dan Tamil. Penyebaran risalah ini dilakukan dalam pelbagai cara termasuklah disebarikan melalui pengangkutan udara. Iklan dan wayang gambar digunakan untuk membantu penduduk memujuk anggota komunis supaya menyerah diri.

6. Kempen Bulan Rakyat Melawan Penjahat

Pada 22 Disember 1949, Majlis Perundangan Persekutuan mengisytiharkan kempen "Bulan Rakyat Melawan Penjahat". Penduduk berbilang kaum diseru supaya mendaftarkan diri secara sukarela dengan pihak berkuasa. Menjelang bulan Mac 1950, jumlah sukarelawan telah mencecah ke angka 435 905 orang.

Sukarelawan ini terdiri daripada penduduk lelaki dan wanita daripada pelbagai sektor termasuklah golongan profesional. Kempen tersebut berjaya melibatkan rakyat berbilang kaum yang bekerjasama menentang komunis. Pelaksanaan kempen tersebut dapat menggalakkan interaksi dan mengeratkan hubungan antara kaum.



Penduduk turut menyertai perarakan bersempena dengan "Kempen Bulan Rakyat Melawan Penjahat" yang diadakan di Semenyih.

Sumber: Malaysia, Jabatan Warisan Negara, 2007. *Merdeka Oleh Satu Perjuangan*. Kuala Lumpur: Jabatan Warisan Negara.

7. Perintah Berkurung

Perintah berkurung ialah tindakan melarang penduduk keluar dari rumah dalam tempoh tertentu. Perintah berkurung membolehkan pasukan keselamatan menjalankan operasi dengan lebih berkesan. Misalnya, pada bulan Jun 1951, penduduk di kawasan Labis, Johor, dikenakan perintah berkurung untuk membolehkan pasukan keselamatan menjalankan operasi memburu komunis.

Selain itu, perintah berkurung dikenakan terhadap penduduk yang enggan bekerjasama dengan pihak berkuasa untuk membanteras ancaman komunis. Contohnya, pada bulan Mac 1952, penduduk Tanjung Malim dikenakan perintah berkurung selama 22 jam untuk mengelakkan mereka berhubung dengan komunis. Tindakan ini dibuat apabila 40 orang komunis menyerang sekumpulan pekerja yang dihantar untuk membaiki paip air. Kejadian ini mengorbankan 12 nyawa. Siasatan dijalankan oleh pihak polis tetapi tidak memperoleh sebarang maklumat. Pada 27 Mac 1952, Sir Gerald Templer (Templer) tiba di Tanjung Malim untuk memaklumkan penduduk tentang hukuman terhadap sikap mereka yang enggan memberikan sebarang maklumat tentang gerakan komunis kepada kerajaan.



Bagaimanakah kerajaan menyiarkan syarat tawaran pengampunan?

8. Perang Saraf

Perang saraf ialah rancangan yang dilaksanakan oleh British untuk menghapuskan komunis melalui usaha memenangi hati dan fikiran rakyat. Pada tahun 1952, Templer dilantik menjadi Pesuruhjaya Tinggi British di Tanah Melayu. Beliau bertindak untuk memenangi hati dan fikiran penduduk Persekutuan Tanah Melayu. Beliau ingin menjalinkan hubungan baik dengan penduduk tempatan supaya mereka bekerjasama dengan pihak kerajaan dan menyampaikan segala maklumat tentang komunis. Perang saraf berjaya memujuk rakyat berbilang kaum supaya bersatu dan membanteras ancaman komunis.

Mengadakan Lawatan

Templer mendampingi rakyat untuk mengetahui masalah dan pandangan mereka. Beliau melakukan sebanyak 122 lawatan ke sekolah, kampung, hospital, dispensari, bilik operasi, pondok polis, unit pasukan keselamatan, buruh, lombong, estet dan bersedia menerima perwakilan. Setiap lawatan mengambil masa dua hari hingga tiga hari. Seterusnya, dengan diiringi oleh isteri, beliau melakukan 20 lawatan ke Kampung Baru dan Kampung Melayu. Sementara itu, isteri beliau menubuhkan cawangan Palang Merah, Pandu Puteri dan pusat komuniti.

Melonggarkan Syarat Kewarganegaraan

Melonggarkan syarat kewarganegaraan bagi menarik kaum bukan Melayu menjadi rakyat Tanah Melayu. Langkah ini penting untuk mewujudkan bangsa yang bersatu. Kesannya, pada 14 September 1952, seramai lebih kurang 1.2 juta orang Cina dan 180 ribu orang India layak menjadi warganegara.

Mengadakan Pilihan Raya Majlis Perbandaran Kuala Lumpur

Kerajaan mengadakan pilihan raya tempatan pertama bertujuan menggalakkan penyertaan orang bukan Melayu dalam politik dan mendapatkan sokongan untuk menentang komunis.

Menawarkan Hadiah Wang Tunai

Hadiah wang tunai turut ditawarkan kepada penduduk yang dapat menangkap atau memberikan maklumat tentang gerila komunis. Contohnya, sesiapa yang berjaya menangkap Chin Peng, pemimpin PKM sama ada hidup atau mati akan diberikan hadiah sebanyak \$250 ribu.

Memenangkan Kepercayaan Orang Asli

Templer berusaha untuk memenangi kepercayaan Orang Asli supaya mereka menyokong kerajaan dalam usaha menghapuskan komunis. Beliau mendirikan 14 kubu untuk mendapatkan sokongan Orang Asli. Kubu ini menyediakan kemudahan barangan keperluan harian, perubatan, pendidikan dan perlindungan.



Templer melakukan lawatan untuk mendampingi rakyat.

Sumber: Mohd Azzam Mohd Hanif Ghows, 2007. *The Malaysian Emergency Revisited 1948-1960*. Edisi kedua. Kuala Lumpur: AMR Holding Sdn. Bhd.



Penduduk keluar mengundi.

Sumber: Mohd Azzam Mohd Hanif Ghows, 2007. *The Malaysian Emergency Revisited 1948-1960*. Edisi kedua. Kuala Lumpur: AMR Holding Sdn. Bhd.

Memajukan Perkhidmatan Penerangan

Kerajaan turut memajukan perkhidmatan penerangan untuk mendapat sokongan penduduk tempatan. Jabatan Penerangan dan Perkhidmatan Radio Malaya dijadikan medium untuk menimbulkan kesedaran kepada masyarakat agar menyokong kerajaan membanteras komunis. Jabatan ini bertanggungjawab menyebarkan risalah antikomunis kepada penduduk dan risalah kerajaan kepada komunis di dalam hutan.

Memperkenalkan Kawasan Hitam dan Kawasan Putih

Kerajaan memperkenalkan konsep "kawasan hitam" dan "kawasan putih". Kawasan hitam ialah kawasan yang terdapat kegiatan komunis yang aktif dan dikenakan perintah berkurung. Kawasan putih ialah kawasan yang diisytiharkan bebas daripada ancaman komunis.

Sehingga tahun 1954, kerajaan mengisytiharkan Melaka, Terengganu, Kedah, Perlis dan Negeri Sembilan sebagai kawasan putih.



Kawasan putih yang diisytiharkan di Melaka.

Sumber: Malaysia. Jabatan Warisan Negara, 2007. *Merdeka Obor Satu Perjuangan*. Kuala Lumpur: Jabatan Warisan Negara.

9. Rundingan Baling

Bagi menamatkan ancaman komunis dan mencapai kemerdekaan, Tunku Abdul Rahman mengadakan pertemuan dengan pemimpin PKM di Sekolah Ingeris, Baling, Kedah, pada 28 Disember 1955. Pertemuan tersebut melibatkan kerajaan Persekutuan Tanah Melayu dengan PKM. Wakil Persekutuan Tanah Melayu ialah Tunku Abdul Rahman yang ditemani oleh Tan Cheng Lock dan David Marshall, sementara PKM diwakili oleh Chin Peng, Chen Tien dan Rashid Maidin.

Tunku Abdul Rahman meminta Chin Peng membubarkan PKM, meletakkan senjata dan menyerah diri. Chin Peng pula menetapkan syarat, iaitu peletakan senjata dan penyerahan diri akan dibuat seandainya kerajaan bersetuju mengakui PKM sebagai sebuah parti politik yang sah. Tunku Abdul Rahman enggan menerima syarat tersebut. Oleh hal yang demikian, rundingan tersebut telah menemui kegagalan.



Kedatangan wakil kerajaan. Dua dari kiri David Marshall, Tan Cheng Lock dan Tunku Abdul Rahman.



Rashid Maidin, Chin Peng dan Chen Tien mewakili PKM dalam Rundingan Baling.

Sumber: Malaysia. Jabatan Warisan Negara, 2007. *Merdeka Obor Satu Perjuangan*. Kuala Lumpur: Jabatan Warisan Negara.

Kerajaan berusaha membanteras ancaman komunis melalui pelbagai kaedah. Antaranya termasuklah melalui ketenteraan dan mendapatkan kerjasama daripada rakyat seperti dalam perang saraf. Kejayaan ini mencerminkan kerjasama antara rakyat dengan kerajaan amat penting dalam usaha mempertahankan tanah air.

6.4 Kesan Zaman Darurat terhadap Negara Kita

Darurat memberikan kesan jangka panjang terhadap negara kita dari aspek politik dan sosioekonomi. Peristiwa darurat ini juga mempercepat usaha ke arah rundingan kemerdekaan.

Aspek Politik

Zaman darurat meninggalkan pelbagai kesan dari aspek politik seperti peningkatan jumlah warganegara, penubuhan Malayan Chinese Association (MCA) dan mempercepat kemerdekaan.

Peningkatan Jumlah Warganegara

Kerajaan telah melonggarkan syarat kewarganegaraan pada tahun 1952. Seramai lebih kurang 1.2 juta orang Cina dan 180 ribu orang India menjadi warganegara Persekutuan Tanah Melayu. Kelonggaran syarat ini menunjukkan pengorbanan orang Melayu terhadap kaum lain bagi mewujudkan perpaduan rakyat.

Penubuhan Malayan Chinese Association

Darurat mendorong Sir Henry Gurney mengambil langkah menawan hati penduduk Cina ke arah penubuhan parti politik berorientasikan tempatan. Hasilnya, Tan Cheng Lock membentuk Malayan Chinese Association (MCA) di Kuala Lumpur pada 27 Februari 1949. Penubuhan MCA meyakinkan British bahawa bukan semua orang Cina menyokong komunis. MCA juga bersedia berganding bahu dengan kerajaan memerangi komunis. Sehingga bulan Februari 1953, MCA mempunyai 250 ribu orang ahli. MCA membantu kerajaan dari segi kewangan dan menempatkan 500 ribu orang penduduk semula ke Kampung Baru.

Selain itu, MCA juga menjalankan kutipan derma melalui jualan loteri kebajikan. Kutipan jualan loteri tersebut didermakan kepada penduduk di Kampung Baru. Sehingga pertengahan tahun 1953, MCA berjaya mengumpulkan sejumlah \$2.5 juta bagi memperbaiki kehidupan penduduk Cina di Kampung Baru.

Mempercepat Kemerdekaan

British sedar pihaknya tidak boleh menamatkan darurat melalui strategi ketenteraan semata-mata. Darurat menjadi faktor yang mendorong British bersedia untuk mempercepat kemerdekaan Persekutuan Tanah Melayu.

Penubuhan Jawatankuasa Hubungan Antara Kaum (CLC) meningkatkan kesedaran politik dalam kalangan pemimpin kaum bahawa mereka boleh berkongsi kepentingan dan hala tuju yang sama melalui penubuhan Parti Perikatan (UMNO–MCA–MIC). Kemenangan Parti Perikatan dalam Pilihan Raya Umum 1955 memberikan keyakinan kepada British bahawa Persekutuan Tanah Melayu dapat menewaskan komunis melalui perpaduan penduduk yang berbilang kaum. Dalam suasana inilah, British memberikan kemerdekaan kepada Persekutuan Tanah Melayu. Dengan ini, PKM tidak mempunyai alasan untuk meneruskan perjuangannya.



Sebahagian ahli jawatankuasa MCA.

Sumber: Malaysia. Jabatan Warisan Negara, 2007. *Merdeka Obor Satu Perjuangan*. Kuala Lumpur: Jabatan Warisan Negara.



MCA merupakan pertubuhan berorientasikan tempatan yang ditubuhkan semasa zaman darurat. Terangkan kepentingan penubuhan MCA kepada masyarakat Cina.

Aspek Sosioekonomi

Zaman darurat menyebabkan kerugian harta benda, penderitaan rakyat, hubungan kaum terbatas dan meningkatkan jumlah kematian.

Meningkatkan Kos Perbelanjaan

Darurat menjejaskan perkembangan ekonomi dan meningkatkan kos perbelanjaan pihak British untuk menangani ancaman komunis. Anggaran purata kos darurat ialah sebanyak \$250 ribu hingga \$300 ribu sehari. Dengan itu, kerajaan terpaksa membelanjakan lebih \$10 juta sebulan atau \$120 juta setahun untuk membanteras ancaman komunis.

Di samping itu, kerajaan membelanjakan kos yang besar untuk menyelesaikan masalah penempatan semula penduduk di pinggir hutan. Dari tahun 1950 hingga tahun 1953, perbelanjaan kerajaan dianggarkan lebih \$7 juta untuk pembangunan di Kampung Baru.

Menyebabkan Penderitaan dan Kesengsaraan kepada Rakyat

Rakyat menghadapi penderitaan semasa zaman darurat ini. Kawasan ladang dan lombong menjadi sasaran serangan komunis menyebabkan kegiatan ekonomi negara terjejas. Pengeluaran tanaman padi dan makanan lain semakin berkurangan. Akhirnya, harga barang makanan dan keperluan harian melambung tinggi.

Sementara itu, peniaga, pekedai, pengusaha kebun, peladang dan pelombong mengalami kesukaran kerana mereka merupakan sasaran peras ugut komunis bagi mendapatkan wang dan bekalan makanan. Kegagalan memenuhi tuntutan komunis menyebabkan kemusnahan pada lombong, ladang dan kedai serta mengancam nyawa.

Penduduk juga menghadapi kesukaran untuk bergerak dan memperoleh bekalan keperluan kerana terpaksa mematuhi pelbagai peraturan yang dikenakan oleh kerajaan. Akibatnya, penduduk tidak dapat menjalankan kegiatan harian. Ramai pekebun dan pekerja lombong tidak dapat bekerja kerana perintah berkurung dikenakan kepada mereka. Catuan bekalan makanan yang dikenakan oleh kerajaan menyebabkan mereka bergantung pada makanan seperti ubi kayu, keledak dan jagung.

Pasukan keselamatan sedang menjalankan pemeriksaan ke atas barangan yang dibawa oleh penduduk tempatan dalam usaha menghapuskan komunis.

Sumber: Mohd Azzam Mohd Hanif Ghows, 2007. *The Malayan Emergency Revisited 1948-1960*. Edisi kedua. Kuala Lumpur: AMR Holding Sdn. Bhd.



Pemeriksaan sedang dijalankan oleh Home Guard untuk membanteras komunis.

Sumber: Mohd Azzam Mohd Hanif Ghows, 2007. *The Malayan Emergency Revisited 1948-1960*. Edisi kedua. Kuala Lumpur: AMR Holding Sdn. Bhd.



Merenggangkan Hubungan Kaum

Rancangan penempatan semula Kampung Baru didominasi oleh kaum tertentu. Kaum Cina dikumpulkan di kawasan petempatan yang sama, manakala kaum lain di petempatan lain. Petempatan baharu yang dilengkapi dengan prasarana biasanya berkembang menjadi bandar baharu, manakala kaum Melayu hanya tertumpu di kampung yang serba kekurangan.

Kawalan pasukan keselamatan yang ketat menyebabkan hubungan dengan kaum lain terbatas. Kehidupan demikian tidak memberikan ruang kepada penduduk Kampung Baru untuk bersosial dengan kaum lain. Pengasingan ini menyebabkan hubungan antara kaum semakin renggang.



Perdana Menteri Persekutuan Tanah Melayu, Tunku Abdul Rahman menandatangani penamatan Ordinan Peraturan-Peraturan Darurat 1948.

Sumber: Pusat Maklumat Utusan dan Unit Foto Utusan Melayu (M) Bhd.

Penamatan Darurat

Darurat telah menyebabkan banyak nyawa terkorban, kemusnahan harta benda dan membawa kesengsaraan kepada rakyat. Penamatan zaman darurat di seluruh negara berkuat kuasa mulai 31 Julai 1960. Dengan itu, berakhirhlah zaman darurat yang berlangsung selama 12 tahun di negara kita.

Darurat meninggalkan kesan dari aspek politik dan sosioekonomi. Darurat juga menyebabkan rakyat hidup dalam penderitaan.

Tempoh darurat selama 12 tahun menyebabkan kesengsaraan dan kesulitan kepada penduduk tempatan. Tindakan komunis memusnahkan kemudahan asas serta menyerang penduduk dan anggota keselamatan menyebabkan keadaan huru-hara di negara kita ketika itu. Pelbagai usaha dilakukan oleh kerajaan untuk membanteras komunis dan mengembalikan keamanan negara kita. Bagi menghargai keamanan yang dikecapi, kita perlu bersama-sama mempertahankan negara daripada musuh.

Jumlah Korban Zaman Darurat

Darurat menyebabkan banyak anggota pasukan keselamatan, komunis dan orang awam terkorban. Darurat menyebabkan penderitaan dan kesengsaraan kepada penduduk Persekutuan Tanah Melayu.



Repeal of The Emergency Regulation.

Sumber: Mohd Azzam Mohd Hanif Ghows, 2007. *The Malayan Emergency Revisited 1948-1960*. Edisi kedua. Kuala Lumpur: AMR Holding Sdn. Bhd.

Berdasarkan peta pemikiran yang sesuai, lakarkan kesan zaman darurat di negara kita.



ANCAMAN KOMUNIS DAN PERISYTIHARAN DARURAT

Kemasukan Pengaruh Komunis di Negara Kita

- Kemasukan Pengaruh Komunis dari China
- Kemasukan Pengaruh Komunis dari Indonesia
- Penubuhan Parti Komunis Malaya

Ancaman Komunis di Negara Kita

- Perisytiharan Darurat
- Tindakan Komunis

Usaha Menangani Ancaman Komunis

- Penguatkuasaan Undang-Undang Darurat
- Pemerkasaan Pasukan Keselamatan
- Pendaftaran Kebangsaan dan Kad Pengenalan
- Rancangan Briggs
- Tawaran Pengampunan
- Kempen Bulan Rakyat Melawan Penjahat
- Perintah Berkurung
- Perang Saraf
- Rundingan Baling

Kesan Zaman Darurat terhadap Negara Kita

- Aspek Politik
- Aspek Sosioekonomi
- Penamatan Darurat

Aktiviti 1: Hentian Bas (Bus Stop)

Arahan:

1. Beberapa buah hentian diwujudkan di dalam kelas. Setiap satu hentian disediakan soalan.
2. Murid bergerak secara berkumpulan dari satu hentian ke hentian yang lain untuk membincangkan soalan yang disediakan.
3. Murid berkongsi pendapat dan merekodkan komen serta maklumat yang diperolehi.

Stesen 1 - Berdasarkan gambar yang berikut, apakah yang anda faham tentang Rancangan Briggs?



Sumber: Mohd Azzam Mohd Hanif Ghows, 2007, *The Malayan Emergency Revisited 1948-1960*. Edisi kedua. Kuala Lumpur: AMR Holding Sdn. Bhd.

Stesen 2 - Bagaimanakah kerajaan menangani ancaman komunis semasa zaman darurat?

Stesen 3 - Jelaskan peranan pasukan polis semasa zaman darurat.

Stesen 4 - Terangkan peranan pasukan tentera semasa zaman darurat.

Aktiviti 2: Saya Lihat, Saya Fikir, Saya Tanya (I See, I Think, I Wonder)

Arahan:

1. Catatkan perkara yang anda lihat.
2. Fikirkan perkara yang anda lihat.
3. Tanyakan soalan yang berkaitan dengan gambar di bawah.

Gambar di bawah merujuk peristiwa Rundingan Baling 1955.



Sumber: Wendy Khadijah Moore, 2004. *Malaysia: A Pictorial History 1400 – 2004*. Kuala Lumpur: Arkib Negara Malaysia dan The New Straits Times Press (Malaysia) Berhad.

Secara berkumpulan, bincangkan soalan yang berikut:

- (a) Apakah yang anda lihat di dalam gambar?
- (b) Bincangkan peristiwa Rundingan Baling 1955.
- (c) Mengapakah Rundingan Baling 1955 menemui kegagalan?
- (d) Apakah peranan anda untuk mengekalkan kedaulatan negara ini?



1. Dialog di bawah mungkin berlaku pada zaman darurat di Tanah Melayu.

Pegawai British:	Tuan, kita menghadapi kesukaran untuk membanteras ancaman komunis kerana mereka mendapat bantuan daripada Min Yuen.
Pesuruhjaya Tinggi British:	Jika begitu, saya akan arahkan Sir Harold Briggs untuk menangani masalah ini.

Bagaimanakah Sir Harold Briggs menyelesaikan masalah tersebut?

- A. Mengisytiharkan darurat
 - B. Melancarkan perang saraf
 - C. Memperkenalkan tawaran pengampunan
 - D. Melaksanakan kawasan penempatan semula
2. Gambar yang berikut merujuk Sir Gerald Templer semasa melancarkan perang saraf.



Bagaimanakah beliau mendapatkan sokongan penduduk supaya menyokong usaha perang saraf tersebut?

- A. Mewujudkan Kampung Baru
 - B. Memperkenalkan kad pengenalan
 - C. Membawa masuk tentera Komanwel
 - D. Melonggarkan syarat kewarganegaraan
3. Kerajaan membelanjakan sebanyak \$250 ribu hingga \$300 ribu sehari untuk pertahanan negara antara tahun 1948 hingga tahun 1960.

Mengapakah keadaan sedemikian berlaku?

- A. Menamatkan konfrontasi
- B. Membendung rusuhan kaum
- C. Menghapuskan kegiatan lanun
- D. Membanteras ancaman komunis



4. Petikan yang berikut tentang perang saraf.

Perang di Tanah Melayu ialah perang saraf. Penyelesaiannya tidak terletak di tangan individu dan tidak di tangan kerajaan di United Kingdom. Tanggungjawab ini terletak di tangan kita semua, rakyat Tanah Melayu dan kerajaan yang berkhidmat untuk mereka.

Sir Gerald Templer

Sumber: *The Straits Times*, 8 Februari 1952, hlm. 7.

- (a) Apakah maksud perang saraf?
(b) Mengapakah Sir Gerald Templer memperkenalkan kempen perang saraf untuk menbanteras ancaman komunis di Tanah Melayu?
(c) Sejauh manakah pelaksanaan perang saraf mencapai matlamatnya?
(d) Berdasarkan pengetahuan sejarah anda, syorkan langkah yang perlu dilakukan oleh rakyat untuk membantu kerajaan menbanteras ancaman komunis.
5. Gambar di bawah menunjukkan Sir Donald MacGillivray sedang memeriksa perbarisan *The Boys Wing of the Federation Military College* bersempena dengan perasmian Federal Military College (FMC) di Port Dickson pada tahun 1954.



Sumber: Mohd Azzam Mohd Hanif Ghows, 2007. *The Malayan Emergency Revisited 1948 – 1960*. Edisi kedua. Kuala Lumpur: AMR Holding Sdn. Bhd.

- (a) Pada pandangan anda, mengapakah British menubuhkan institusi tersebut?
(b) Setiap murid perlu menyertai pasukan badan beruniform di sekolah. Apakah kepentingan menyertai pasukan badan beruniform ini?
(c) Bagaimanakah anda dapat memainkan peranan untuk menggerakkan masyarakat supaya menghargai sumbangan pasukan keselamatan kepada keamanan dan keharmonian negara?



Nilai, Patriotisme dan Iktibar

- Kestabilan dan kemakmuran negara yang kita kecapi pada masa ini perlu dikekalkan.
- Kestabilan dan kemakmuran negara merupakan hasil perjuangan masyarakat terdahulu yang harus dipertahankan demi kelangsungan generasi akan datang.
- Semangat juang dan pengorbanan mereka yang berjuang demi kestabilan dan kemakmuran negara hendaklah dicontohi dan dihargai.

Diri dan Keluarga

Kestabilan dan kemakmuran negara yang kita nikmati pada hari ini disebabkan oleh pengorbanan generasi masa lalu. Oleh sebab itu, kita harus menerapkan semangat sedia berkorban untuk membolehkan kita melindungi ahli keluarga dan masyarakat daripada ancaman musuh negara.

Negara

Kestabilan, keselamatan, keamanan, keharmonian dan kesejahteraan merupakan faktor anjakan pembangunan dan pemodenan negara yang berjalan dengan jayanya.



Pemodenan angkatan tentera merupakan usaha kerajaan untuk memelihara keselamatan negara daripada ancaman musuh.
Sumber: Pusat Maklumat Utusan dan Unit Foto Utusan Melayu (M) Bhd.